



De Platte Knuet



DE CHEFSCOUT

Säi Versprechen



RÉCKBLÉCK

National Aktivitéiten, Formatiounen



AKTIVITÉITSSÄITEN

Spiller, Bastelen



Ee grouse Merci un eis Sponsoren

C'est la chaussure qui fait l'allure

C'est l'assurance qui fait la voiture



LALUX est une marque du Groupe LA LUXEMBOURGEOISE

Votre **nouvelle voiture**, tout comme vos chaussures, vous permet de vous déplacer aisément et souligne votre style et votre besoin de liberté!

- Grâce aux formules 'Performance', 'Confort' et 'Sécurité', **easyPROTECT-Auto** s'adapte à vos besoins personnels, vos moyens et votre voiture.
- **easyPROTECT-Auto**, c'est une couverture ultra-complète qui vous permet d'opter pour une garantie Casco sans Malus, des services d'assistance 24 heures sur 24 et le paiement par mensualisation gratuite.
- Profitez en plus de rabais exceptionnels: rabais de bienvenue pour tout nouveau client, rabais de pluralité jusqu'à 100.- € par voiture lors du regroupement de vos contrats d'assurances.

easyPROTECT-Auto, c'est votre choix de qualité! Parlez-en à votre agent ou contactez notre service clientèle au tél. 47 61-1.

Découvrez les avantages de votre espace client

lalux for you sur www.lalux.lu

lalux - meng Versécherung

Schneller = Besser? An dann ...?

Léif Cheftainen a Chef,

De Start an d'Scoutsjoer 2019/2020 hat et an sech: e Chef Weekend am Mariendall, eng Nei Form vu Chefdag, a Kombinatioun mam Kanudag, dem Chef Scout säi Versprechen op der Kinnekswiss an der Stad an natierlech eise Kongress. D'LGS Schëff muss elo nees a säi gewinnen, méi rouege Rhythmus kommen a sech vu sengem Alldag nees afänke loossen.

Schnell oder Iwwerluecht?

An der läsch ass ëmmer erëm vill iwwert d'Kommunikatioun geschwat ginn: matenee schwätzen, een deen aneren informéieren, eigentlech d'Basis vun all gudder Kommunikatioun. Zemoools haut, am Zäitalter vun den onbegrenzten technologesche Méiglechkeeten, wéi Mail, What'sApp an aner Messenger. Ma och dat ass méi einfach gesot, wéi gemaach.

Hautzedaags ass de Motto vun eiser Gesellschaft, "schneller = besser". Mir mengen ëmmer erreechbar missen ze sinn a mir fillen eis dozou verpflichtet, schnellstméiglech eng Äntwert op eng Fro ze ginn oder ee Statement ze maachen; munchmol ouni dobäi de Kapp wierklech anzeschalten.

Oniwwerluechte Message gi gäre mol no hanne lass, sief dëst an der Aart a Weis, wéi se geschriwwen ginn, oder duerch den Toun, deen tëscht den Zeilen duerchschéngt. An sou Message sinn dann am Ufank vun engem Däiwelskrees, wou all weidere Message, eng nach méi hefteg Reaktioun ervirriff. Iwwerflësseg ze betounen, datt de gesonde Mënscheverstand a virun allem iwwerluechten, objektiv Äntwerten ëmmer méi schwierig ginn. Eemol méi duerchotmen, beim Liese vun enger Mail oder während enger Diskussioun, sech net ëmmer direkt äusseren, ma dat Ganzt eng zweete Kéier z'iwwerlesen, z'iwwerdenken, jo souguer nozefroen, fir esou vläicht de Message richteg kënnen ze verstoen a versichen eng Äntwert ze ginn, déi am Inhalt an am Toun ubruecht ass.

Zesumme kënnen mir viles besser maachen, wa mir eis Zäit ginn, déi néideg Iwwerleeung ze féieren.

Corporate design

D'Visual Identity vun den LGS ass a villen Aarbechtsstonnen entstan. Lo haalt dir dann déi läsch Version vum Platte Knuet a senger aktueller Form an ären Hänn. Dee nächste Platte Knuet kënn dann an iwwerschafftem neie Look eraus. Iwwerluecht, net iwwerstierzt, ass ee Konzept entstan, dat den Ufuerderunge vun der Zäit Rechnung dréit.

Wann dës Iwwerleeungen (besser well iwwerluecht an net well iwwerstierzt) kënnen an engem Virsaz resümiert ginn, da wënsche mir iech, datt och dir fir dat neit Joer e Virsaz fannt, mat deem dir iech wëllt ausernee setzen an esou zum bessere Guidissem a Scoutissem vun den LGS bäidroen kënn. D'Team a säi ganze Comité wënschen iech all eng schéin a besännelech Zäit zum Enn vum Joer 2019 an alles Guts fir 2020.

Deemno freeë mir eis drop, iech um Neijoerschpatt, den 10. Januar 2020 an der Géisserei ze begrëssen an esou zesummen op dat neit Joer unzestoussen.

Be prepared!

Anouk Galassi, Commissaire générale

Yves "Ivo" Marchi, Commissaire général adjoint



Plus rapide, c'est mieux? Et ensuite...?

Chères cheftaines, chers chefs,

L'année Scout 2019/2020 a démarrée au quart de tour : le WE des chefs au Centre de formation du SNJ du Marienthal sous une forme nouvelle combinant la journée des chefs et la journée de formation continue (Kanudag), la cérémonie de promesse de notre Chef Scout à Luxembourg-Ville (Kinnekswiss), ainsi que notre congrès annuel. La barque des LGS doit maintenant retrouver des eaux plus calmes pour continuer sa navigation à travers ses occupations quotidiennes.

Rythme accéléré ou réfléchi ?

Un sujet très discuté ces derniers temps fût celui de la communication: discuter ensemble, s'informer mutuellement, bref, des concepts de base de toute communication. Ce d'autant plus que nous disposons aujourd'hui de moyens technologiques illimités tels les courriels, What's up et autres Messenger. Ce constat théorique ne cadre cependant pas toujours avec la réalité.

De nos jours, la société est poussée par la devise « toujours plus vite, donc toujours mieux ». Nous pensons que nous devons toujours être joignable et nous nous sentons contraints de répondre au plus vite à une question ou de faire une déclaration, tout en oubliant parfois de réfléchir vraiment sur la portée de nos propos.

Des messages irréfléchis peuvent avoir des conséquences néfastes, en fonction des termes employés ou des sous-entendus qui peuvent jaillir entre les lignes. De tels messages sont alors le point de départ d'un cercle vicieux, où chaque message supplémentaire engendre une réaction encore plus véhémement. Il va de soi que le bon sens et que des réponses réfléchies et plus objectives deviendront une denrée rare dans ce cas.

Prendre un instant de recul lors de la lecture d'un courriel ou lors d'une discussion, sans se sentir obligé de répondre immédiatement, est éventuellement une voie à parcourir. Relire un texte, réfléchir sur les propos exprimés, ne pas avoir peur de demander des précisions, afin de mieux cerner la portée de la discussion, sont autant de possibilités pour se forger une opinion et pour donner une réponse adéquate quant au fond et quant à la forme.

Ensemble nous pouvons améliorer la communication, si nous nous donnons le temps nécessaire à la réflexion.

Corporate design

La nouvelle identité visuelle des LGS est le fruit de nombreuses heures de travail. Aujourd'hui vous tenez en main la dernière édition de notre publication « Platte Knuet » dans sa forme actuelle. La prochaine édition tiendra compte des nouvelles règles de corporate design. Il est le résultat d'un travail non précipité et qui répond aux exigences de notre temps.

Si on en arrive à la conclusion que les réflexions formulées ci-avant (« meilleures » car réfléchies et non précipitées) peuvent se résumer à une résolution, nous vous souhaitons de formuler vos résolutions pour la nouvelle année guide/scoute auxquelles vous souhaitez vous confronter pour essayer d'améliorer le travail que vous accomplissez au sein des LGS.

Nous vous souhaitons, avec notre comité fédéral, une bonne fin d'année 2019 et que 2020 réponde à vos attentes.

Nous nous réjouissons de lever le verre avec vous à l'occasion de notre pot de nouvel an, le 10 janvier 2020 au siège social, d'Géisserei.

Be prepared!

Anouk Galassi, Commissaire générale

Yves "Ivo" Marchi, Commissaire général adjoint



Eng Visioun fir d'LGS*

*"Je ne vois qu'un moyen de savoir jusqu'où l'on peut aller: c'est de se mettre en route et de marcher."
(Henri Bergson in L'énergie spirituelle)*

All Zäit bitt nei Méiglechkeeten an huet seng Erausforderungen. D'LGS hunn dat an der Vergaangenheet bewosst gelieft a wëllen och an Zukunft e wichtege Acteur an der Gesellschaft sinn. Si wëlle weiderhin e kreativen an oppene Kader bidden, wou Jonker hire perséinleche Wee ausprobéieren a fanne kënnen.

1. Gesellschaftlech Erausforderungen

Vill Jugendlech sinn haut onsécher, hunn Angscht virun der Zukunft. Si stellen sech Froen iwwer d'Klima an d'Ëmwelt, also och ëm hir Gesondheet. Bei den LGS erliwien déi Jonk, wéi een eise Planéit am alldeegleche Liewe schützt. Do ginn alternativ Weeër zum iwerméisge Konsum, fir eng méi natierlech Liewensweis ausprobéiert.

D'LGS sinn e Jugendmouvement, wou ee léiert, wéi wichtege et ass sech och politesch fir d'Wuel vun der Welt an den nächste Generatiounen ze engagieren. En entwéckelt Projete vu Friddensarbecht, Entwécklungsarbecht an der Drëtter Welt, an d'Arbecht mat Flüchtlinge weider. Duerch Erliewe vun Toleranz, Respekt a Léift erzitt en géint Angscht an Nationalismus.

2. Froe vun der Jugend

Nei Fräiheeten an der Gesellschaft schafen nei Méiglechkeeten, mee stellen och Erausforderungen duer: wie sinn ech, wat wëll ech, wat gëtt mer d'Sécherheet, datt dat wat ech decidieren, dat richteg ass? Jugendlech stellen sech Froen zu hirer sexueller Identitéit, zu Zorten vu Partnerschaft, zu hirem spéidere Beruff, zu hirem Liewensstil. Munch Jugendlech kréien hir Flemm, Enttäuschung a Roserei net richteg formuliert. Et gëtt hinnen och villäicht net richteg nogelauschert. Bei den LGS fannen si Peers an och jonk Erwuessener, mat deenen se iwwer hir Froen an hiert Leed kënnen schwätze fir nei Perspektiven ze gesinn an datt d'Gespréich wichtege am Liewen ass. Och d'Cheftainen a Chef si fit, fir ze gesi wat de Jugendleche beschäftegt. Engem Nolauschteren ass och en Engagement.

Jugendlech stinn oft immens ënner Leeschtungsdruck. Dofir sinn d'LGS eng Plaz wou ee sech ouni Drock entwéckelt, wou déi Jonk hiren Interessen noginn.

De Computer, d'Televisioun, den Handy an d'Playstation sinn haut Deel vun der Fräizäit vu Jugendlechen. Duerch déi nei Medie léieren si munches, mee och aner Formen vu Fräizaitgestaltung hunn hire Wäert. Bei den LGS erliwien si béides, och wéi een déi zwee ka verbannen.

3. Integratioun a Participatioun vun alle Jonken

Och zu Lëtzebuerg gëtt et Kanner- a Jugendaarmut, souwuel am materielle wéi am emotionale Sënn. Et gëtt Jugendlech déi erliwien doheem net déi Gebuergeheet, déi ee Mënsch brauch fir ze wuessen. Verschidder liewen dofir an Opfänkstrukturen.

D'LGS brénge Jonker, deenen et net sou gutt geet, vill. Dem Verband seng

chrëschtlech a sozial Wuerzelen fuerderen en do eraus, kreativ virzegoen. Eis Gesellschaft brauch eng Kultur vun Dialog. Plazen, wou mer léiere mat eise Verschiddenheeten d'Zukunft experimentell unzegoen. D'LGS ginn d'Erausforderung vu Pluralismus a Multikulturalitéit un. Kanner a Jugendlech erliwien hei, datt Wäerter e Wäert hunn, andeems si hir ethesch Prinzipien, spirituell a reliéis Liewensstiler ausprobéieren, liewen a kritesch hannerfroen.

D'Participatioun ass bei den LGS wichtege. „Ask the boy“, sot de B.P. „Learning by doing“ gëllt och fir demokratescht Verhalen. Demokratie liewen a Verantwortung iwwerhuele gëtt bei den LGS ëmmer weider entdeckt an entwéckelt.

4. Nei Weeër

De Scoutismus a Guidismus huet eng formidabel Vergaangenheet zu Lëtzebuerg. D'LGS wëlle weiderhin Geschicht maachen an och schreiwen. Dofir brauch et e Forum fir de Scoutismus a Guidismus ze studieren, iwwer déi jëtzege Defien nozedenken a Perspektiven opzeweisen.

D'LGS brauche Cheftainen a Chef, déi duerch d'Formatioun déi néideg Kompetenze kréien, fir op Schwierigkeeten an Erwaardunge vun de Jonken haut anzegoen.

An eiser komplexer Gesellschaft muss een och nei Formen vu Gemeinschaft a Gruppen fannen.

De Baden-Powell wollt, datt mer zu enger besserer Welt bäidroen. Deen Défi huelen d'LGS och an Zukunft op.

Christiane Meyers

Jean-Marie (Jom) Weber

Marc Weis

** (gekierzt Form vun der Virstellung op der Séance académique 2019)*



DE CHEFSCOUT



1945




1982



2007



2019



1952



2002



2019



Eng Ära geet zu Enn, eng nei fänkt un

D'Kapitel 'Chefscout' huet den 7. Oktober 1945 ugefaangen. Op deem Dag genau gouf tëschent der FNEL an den LGS (deemols LS) en Ofkommen ënnerschriwwen, duerch deem den Daachverband "Luxembourg Boy Scout Association" entstanen ass. Eng Associatioun huet säin Chef gebraucht.

Den 28. Oktober 1945 war et souwäit. Am Stadium Josy Barthel huet den deemools 24 Joer alen Jean vun Nassau säi Versprieche ofgeluecht an ass eisen éischte Chefscout ginn. Etlech Guiden a Scouten vu béide Veräiner hunn sech am Stadium versammelt, nodeems si zesumme marschéiert sinn an hunn hire Chef vun de Scoute gefeiert!

Säit senger Ernennung als Chefscout huet de Groussherzog Jean dono reegelméisseg un Eventer vun de Verbänn deelgeholl. Dobäi war et egal ob hien net beschter Gesondheet war. Sou huet hie beispillsweis mat engem verletzte Been un der Aweigung vun der Kapell vis-à-vis vum Chalet Nicolas Rollinger um Neihaischen deelgeholl. Dorun erkennt een, wéi verbonnen de Groussherzog Jean Scoutismus an och dem Guidismus

war. Seng Fra d'Groussherzogin Joséphine-Charlotte war bis zu hirem Doud, den 10. Januar 2005, Chefguide.

De 75. Gebuertsdag vum Scoutismus war grouss gefeiert ginn. Vum 21. Juli bis den 30. Juli 1982 hu ronn 3.000 Guiden a Scouten aus dem In- an Ausland sech beim Schlass zu Betzder fir den JUBICA getraff. Och de Grand-Duc Jean huet um Event deelgeholl. Zur Iwwerraschung vu villen, well hie war net ugekënnegt. Ganz roueg hat hien sech an d'Mass vun de Leit gestallt an huet un der Erëffnungzeremonie deelgeholl. Awer en ass nett roueg bliwwen. No kuerzer Zäit huet hien sech bemierkbar gemaach an eng kléng Riet viru Guiden a Scouten aus 23 Länner gehalen.

2002 war d'offiziell Erëffnung vum Chalet Nicolas Rollinger um Neihaischen, bei anere Guiden a Scouten och als Guiden a Scout Center bekannt. Och un dësem Event huet de Groussherzog Jean a Begleedung vun der Chefguide Joséphine-Charlotte seng Präsenz gewisen. Och op der Aweigung vun der renovéierter Geïsserei an där haut net nëmmen e

Chalet mee och d'Sekretariat vun den LGS ass, huet de Chefscout Jean 2007 deelgeholl.

D'Scoutsjoer 2018/2019 stoung ganz am Thema 100 Joer LGS. Säit 100 Joer gëtt et d'LGS an dofir gouf et net nëmmen e grousst Fest, um 18. Mee 2019, mee och eng Seance Académique, déi den 1. Mäerz 2019 stattfonnt huet. Dës Seance ass de leschten offiziellen Event, op deem mir eise fréiere Chefscout nach gesinn haten. Mat grousser Freed huet hie mam Grand-Duc Henri deelgeholl.

Dës ware ganz sécher just e puer vun de remarkabelen an offiziellen Eventer, wou eise Chefscout präsent war. Wärend senge 74 Joer als Chefscout, huet hien sou munches gelescht a mir soen dofir e grouss MERCI!

Ce n'est qu'un au revoir chefscout!

Zirka 6 Méint laang waren d'FNEL an d'LGS ouni Chefscout ënnerwee bis de glécklechen Dag komm ass. De 4. Oktober 2019 hunn sech 54 Gruppen, insgesamt ongeféier 1700 Léit ugemellt, fir bei der Verspriechefeier vun eisem neie Chefscout dobäi ze sinn. Den Ierfgroussherzog Guillaume ass un deem Dag an d'Fousstapfen vun sengem Grousspapp getréppelt an huet säi Versprieche ofgeluecht.

Mir wënschen Iech Ierfgroussherzog alles Guddes a soe Merci, datt dir dës wichteg Roll iwwerholl hutt!!

Réckbléck



Bibertreff 2019

Datum: 29. Juni 2019
Plaz: Klierf
Thema: Op der Sich nom Roboter Rudi
Et hunn deelgeholl: 90 Biber aus 11 Biberfamilljen



Biber- a Wëllefchersandacht

Ronn 100 Biber a Wëllefcher sinn de 25. Mee 2019 eiser Invitatioun fir d'Biber- an d'Wëllefchersandacht an der Kathedral nokomm.



Naturdag Wëllefcher

Den 8. Juni war eisen Naturdag um Neihaischen, dëst Joer an Zesummenaarbecht mat der Ekipp vum Native Village. 130 Wëllefcher waren ugemellt.



Wëllefchersrallye

De Wëllefchersrallye war dëst Joer zu Käl op der Léiffrächen. Sonndes, den 28. Abrëll 2019 hunn sech moies fréi 405 Wëllef an insgesamt 103 Cheffen op de Wee an de Süde bei d'Léiffräche gemaach. Thema vum Rallye war „Op de Spure vum BP“.



Absurdcup 2019

Den 15. Juni beim Chalet vun de Réiser Scouten
Bei guddem Wieder hunn d'Avex op 23 verschiddene Spiller alles ginn, fir ze gewinnen.
Et waren 153 Avex an 57 Cheffen dobäi.





Ironscout:

Wéini: 29.-31.03.2019
 Wou: Region Süd
 Wien: 92 CaraPio
 Bilan: 5074 km sinn zesumme getrëppelt ginn
 Don: 9500 € fir d'Associatioun "Häerzkrank Kanner zu Lëtzebuerg" sinn zesumme komm

JoCaPi:

Wéini: 6.04.2019
 Wou: Miersch
 Wien: 208 CaraPio mat hire Chef aus dem ganze Land
 Gewënner: D'CaraPio vum Dikrecher Grupp



Odyssee-Lancement

Datum : 12-13 Oktober 2019
 Plaz : Neihaischen
 Unzuel un Participanten: 170 RaRo + 30 Staff



Albatrossentreff zu Käl

De nationalen Albatrossentreff sollt ursprénglech de 4ten Mee sinn an ass dunn awer wéinst de Begriffsfeierlechkeete vun eisem Chefscout, déi den Dag stattfonnt hunn op Freides, den 28ten Juni verluecht ginn. Et war wéi déi lescht Joren och en gemittlechen Owend. Duerch déi spontan Ukënnegung an d'Iwwerschneidung mat anere Veranstaltungen haten awer leider manner Albatrossen (+/- 30) wéi déi Jore virdrun de Wee op Käl fonnt. Mir wäerten awer och erëm 2020 en nationalen Albatrossentreff organiséieren an dat dës Kéier zu Klierf.



Unite, Thrive, Grow 16th European Guide and Scout Conference

Mir, d'Young Delegates vun den LGS, konnten Enn August mat der Delegatioun vu Scouting in Luxembourg op d' Europäesch Guide- a Scoutskonferenz zu Split a Kroatien. Dobäi hate mir d'Méiglechkeet Guiden a Scouten aus ganz Europa, an aus der Welt kennen ze léieren, fir zesumme mat hinnen iwwer d'Zukunft vum Guidissem a Scoutissem an Europa ze diskutéieren an ze decidéieren.

Di zwee Weltverbänn WOSM a WAGGGS, bei deene mir als LGS allen zwee Member sinn, probéieren op europäeschem Niveau enk zesummen ze schaffe fir sech géigesäiteg ënnerstëtzen ze kennen. Genau dofir organiséieren se och all dräi Joer an Europa eng Joint Conference fir hir eegen, an awer och fir déi gemeinsam Aarbecht ze verbesseren.

Lass gaange mat eiser Aventure Europakonferenz ass et den 23ten August Moies fréi. Do hu mer eis op der Stater Gare getraff fir eis op de Wee an d'kroatesch Mëttelmierstad Split ze maachen. Schonn zu Frankfurt um Flughafen hu mir Membere vun der däitscher Delegatioun getraff, déi mer schon am März zu Budapest op der Däitschsproocheger Konferenz (DSK) kenne geléiert haten. Zesummen si mer dunn am Nomëtten um Campus vun der Uni Split ukomm. Hei huet eis eng Woch ustrenge Konferenzarbecht, awer och e flotte Programm erwaart.

Iwwer déi nächst 5 Deeg hu mir iwwer all Méiglech diskutéiert: Den nächsten Europacomité, d'Zukunft vun de Scouten a Guiden an Europa, déi nächst grouss Events op europäeschem an och op Weltniveau, d'Finzen an d'Zesummenaarbecht vu WAGGGS a WOSM an Europa. Mee et gouf net just diskutéiert, mir hunn och missen Entscheedungen huelen. Zesumme mat eise Kollege vun der FNEL hu mir am Numm vum SiL zum Beispill en neien Europacomité fir WOSM gestëmmt. Ausserdeem hu mir a villen anere Beräicher Decisioune geholl, wat d'Aarbecht vun de Weltverbänn an Europa iwwer déi nächst dräi Joer ubelaangt.

Niewebäi hat di kroatesch Scoutsfederatioun awer och nach e ganz flotte Programm op d'Been gestallt: Tëscht Ausfluch bei d'Festung Klis, op där eng Rei Zeene vu Game of Thrones gedréint goufen, dem Internationalem Owend bei deem mir eis Lëtzebuerg Kultur virstelle konnten, enger Party op der Plage an enger Ofschlosszeremonie mat Concert virun dem Impressionnante Palais vum Diocletian am Zentrum vu Split war wierklech fir all Geschmaach eppes dobäi.

Donneschdes, den 29ten August hu mir eis doudmëtt op den Heemwee gemaach. No enger laanger an ustrenger Woch a Kroatien hu mir vill flott Erfarunge gesammelt, eis ganz vill mat Scouten aus anere Länner ausgetosch a mat hinne Frëndschafte geschloss, déi hoffentlech nach laang unhale wäerten.

Zum Schluss bléift eis just nach Merci ze soen der ganzer Internationaler Ekipp vum SiL déi eis dës Erfahrung erméiglecht huet an eis bei eisen éischte Schrëtt op internationalem Niveau tatkräffeg ënnerstëtzt huet. Elo freeë mer eis schon op d'nächst Joer, wou mir op de World Scout Youth Forum sou wéi op d'Weltkonferenze vu WOSM a WAGGGS an Egypte respektiv an Uganda ginn.

D'LGS Young Delegates - Jackie, Léini a Max



Gruppenfoto vun der Lëtzebuerg Delegation zesumme mam WOSM World Chairman Craig Turpie

Nach Froen iwwer Internationales?

Méi News iwwer d'Weltverbänn WOSM a WAGGGS, Infoen iwwer d'Weltzentren, Programmer a Campen am Ausland fënns du op: international.lgs.lu



Ronn 69 Biber an hir Cheffe vun Duelem, Diddeleng, Dikrich, Gréiwe-maacher an Eschduerf hunn an der Sommervakanz um Neihaischen hire Summercamp verbruecht. Während 4 Deeg hunn d'Biber d'Alldagsliwen vum klengen Indianerjong Yakari duerch Aktivitéite kennegeleiert, wéi Bastele mat Naturmaterialien, flott Veilléen, e Nuetsspill, eng Visitt an der Syrdallschwämm an e groust Bëschspill vun der ONG.

Nom Bibercamp hunn dunn eng 169 Wëllefcher aus 15 Ruddelen hir Zelter um Neihaischen opgeschloen an hunn zesumme mam Yakari flott a spannend Abenteuer erlieft. Um Programm stoungen: eng Indianerolympiad, Nuetsspiller, en Ausflug an d'Schwämm, Veilléen, Ateliere wéi Brout baken, Schnëtzen, en Totem bastelen, mat Naturfaarwen molen a villes méi.



Organiséiert goufen déi zwee Campe vun der Ekipp Native Village an Zesummenaarbecht mat de Cheffen. Déi zwee Campen hunn sech un Gruppe gericht, déi wéineg Membere resp. wéineg Cheffen hunn. Et war dëst Joer den drëtte Camp an dëser Form, a mir wäerten och an Zukunft dës Offer ubidden.




Net nëmmen de Verband vun den Lëtzebuenger Guiden a Scouten huet 2019 seng 100 Joer gefeiert, mee och de Grupp Saint Marie vu Käl. Mir waren houfreg eise Centenaire mat engem Jubiläumscamp feieren ze kënnen.

Den 20. Juli 2019 war et endlech esou wäit: Eise Camp „Anno 1919“ zu Käl huet ugefaangen. Zesumme mat den Explorer vu Schëffleng a vu Bieles-Metzerlach hu mir vill flott Momenter erlieft. Fir d'alleréischt hunn awer emol missen Zelter a Kachmaschinen opgeriicht ginn. D'Pionéier hunn sech eng Konstruktioon gebaut fir kënnen an der Héicht ze schlofen.

Wou d'Wëllef bis do waren, huet de Camp esou richteg ugefaangen. Lass ass et mat engem Handelsspill gaangen. An den eenzele Gruppen, hunn d'Wëllef, d'Explorer an d'Pionéier misse verschidde Materialien (z.B. Holz, Steng, Seeler, ...) sammelen. Mat deene konnten si sech alles kafe wat si gebraucht hunn fir hier Mini-Campplaz ze bauen. E Jury huet dono entscheet weie Grupp déi schéinste Campplaz gebaut hat.

Bei der Ufanksveillé hat de Grupperot eng besonnesch Iwwerraschung



fir all Member virgesinn: am Kader vun den 100 Joer Feierlechkeete krut all Scout de Foulard vum Käler Grupp iwwerreecht. De Programm huet awer nach esou munch aner Iwwerraschung virgesinn: Esou hunn d'Wëllef sech konnte mat Waasserspiller ofkillen. D'Explorer konnten um Hike um Wiki Beach schlofen. An d'Pionéier hunn missen duerch de Stau schwamme fir op hier Schlofplaz ze kommen.

Besonnesch flott war deen Dag, wou lauter Ateliere um Programm stoungen. A verschidde Ateliere misst een e bësse méi handwierklech begaabt sinn. Esou zum Beispill konnt ee mat de Schmatte vun der Hephaistos Bruderschaft Foulardsréng schmiden. An aneren Ateliere hunn déi eenzel Scoute missen hier Kreativitéit ënnert Beweis stellen, wéi am Theateratelier oder am Atelier „Spuerenzeechen“. An dem Atelier „Outdoor Küche“ konnt ee sech kulinaresch ausprobieren.

Jiddere konnt sech déi Aktivitéiten aussichen, déi engem am meeschten zogesot hunn. Um Openday konnten d'Leit eis Campplaz besiche kommen. Fir eis kleng Visiteuren hate mir verschidde Spiller virgesinn. Mëttes ass et dunn Fierkel um Spiiss ginn.



Gutt ënnerwee!



Informatioun a Reservatioun
Sales-Lentz, Ären Expert fir Bus-Locatiounen
© (+352) 26 65 11
(Méindes bis Freides 8.00 - 17.00)
www.sales-lentz.lu

 **Sales-Lentz**
moving people

Gamma-Albatrossen

E flotten Dag mat de Gamma-Albatrossen

Den 28.9.2019 hunn sech 18 Gamma-Albatrossen an ronn 10 Begleeder zu Leideleng getraff fir e gemeinsamen Dag mateneen ze verbréngen.

Ee volle Succès, wann ee bedenkt dass et d'Albatrossen vun de Gamma éreischt säit leschtem Joer gëtt.

Moies konnten d'Gamma an Atelierien hir Kachtalenter ënner Beweis stellen. Um Menü stoung Pakalu an Tiramisu. Béides huet de Participante super geschmaach.

Mëttes gouf et dann nach eng Foulardsiwwerreechung mat Verspriechefeier. D'Freed war immens, wéi se dunn endlech de laang erwaarte Foulard droen duerften. A spëtstens dunn war och kloer: dëst war sécher net déi läschte Aktivitéit vun de Gamma Albatrossen, mee en neien Ufank vu ville weideren. Jiddereen, vum Participant bis zum Begleeder, huet versprach an Zukunft weider mat grousser Freed un de Gamma-Albatrossen Aktivitéiten deelzehuelen.

WANTED : CHEF a BEGLEEDER FIR GAMMA

Fir dass mir bei de Gamma weiderhi flott Aktivitéite maache kënnen, net nëmme bei den Albatrossen, mee ganz besonnesch och bei de Wëllef an Avex, si mir op eng ganz Rei Begleeder a Chef ugewisen.

Falls du Loscht hues bei eis laanscht kucken ze kommen, da mell dech op gamma@albatrossen.lu oder um 691 81 70 27 (Mini, Gruppchef adjoint).

Mir géifen eis freeën!



Formatiounen

Avex-STIP

Vum 19.-22. Abrëll hunn eng ronn 35 Kandidaten um Stip um Neihaischen ënnert dem Thema „Lëtzebuerg“ deelgeholl. 3 weiderer si fir de Methodendag dobäi komm.



Formatiouns-Weekend fir GC

Den 23. a 24. Mäerz war eise Formatiouns-weekend um Neihaischen, et hunn 11 Kandidaten deelgeholl. Hei konnten déi zukünfteg Gruppechef/ tainë vill iwver hir spéider Tâche als Gruppecheftaine a Gruppechef léieren.



STAP

Vum 31.08-07.09.2019 hunn sech 53 Chef aus alle Branchen um Neihaischen getraff fir den 2. Formatiounsdeel unzefänken.



BiRo-STIP

Datum: 26. – 28. Oktober 2019
Thema: Zesummen an d'Natur!
Wou? Géisserei
Kandidaten: 3 Biber an 2 Raro + 13 zousätzlech Cheffen um Methodendag



Kanu- a Chefdag

Dat neit Guiden a Scoutsjoer huet am Kader vum MOSAIK Festival ugefaangen.

Den 21. September hunn sech 50 Chef/tainen aus de verschidde Branchen op de Wee an de Mariendall gemaach fir hir bestoend Formatioun verlängere ze kënnen. A verschidde Atelieren hunn si nei Informatiounen an neit Wëssen opgebaut.

Den Owend konnten eng ronn 80 Chef/tainen, déi d'Nuecht op der Plaz verbruecht hunn, dräi Concerte genéissen vun Nicool; Gaasrockbluesband, Plem Plem Soundsystem oder einfach e kleng spirituelle Moment beim Lagerfeier verbréngen.

Zirka 330 Léit aus de verschidde Branchen a Gruppen uechtert d'Land hunn sech den nächsten Dag, den 22. September, och op de Wee gemaach. Am Kader vum Chefdag hunn si sech am Mariendall versammelt fir op den Informatiounsstänn hiert Wëssen ze beräichere, op munche Stänn Handwerk a Geschéck ze weisen an op weidere Stänn Info fir dat kommand Joer ze sammelen. Am Laf vum Dag duerften si alleguer och an eng Brancheversammlung goen, wou si déi neisten Informatiounen op e Coup kritt hunn.



Kongress

De 16. Oktober huet de Grupp Saint Paul vu Bieles am Kader vun hirem 75 järege Bestoen op de Kongress zu Zolwer invitéiert.



Réckbléck EAS

Time out

Den 18. Oktober waren 10 Chef/tainen an engem relaxe Kader um Neihaischen zesummen, wou si an der Natur e spirituelle Moment erlieft hunn. Bei engem klengen Maufel konnten si an d'Gespréich kommen a kuerz Distanz zum Alldag kréien.

Orval

Vum 4. bis de 5. Mee hu mir zu 7 Chef/tainen e Weekend am Trappisteklouschter zu Orval an der Belsch verbruecht. Mir konnte vun der Rou vum Klouschter profitéieren an um Rhythmus vum Dagesoflaf vun de Pateren deelhuefen. Doniewent hate mir genuch Zäit fir eis auszetauschen an zu ons selwer ze fannen. (Et krut ee fir de Weekend 2 Paddelen)

Sprangprëssessioun


12 Guide/Scoutsmusikanten a 75 Sprénger hunn dëst Joer Péngschtdënschdeg un der Sprangprëssessioun deelgeholl. Duerno gouf an engem gemittleche Kader zesumme gegrillt.

Spiri fir Kids

Jonk Guiden a Scouten entdecken hir chrëschtlech Wuerzelen. Unhand vun der biblescher Geschicht vum verluerene Schof, hu Kanner um Neihaischen en Dag an der Natur verbruecht. Si hunn entdeckt, wéi en Hiert a bibleschen Zäite gelieft huet a wat d'Geschicht fir ons haut bedeite kann.

Mat enger selwergemaachter Schleider hunn si sech op de Wee gemaach fir dem Hiert ze hëllef, säi Schof erëmzefannen. Si konnten d'Suergen deelen, déi den Hiert sech ëm säi Schof mécht an hunn ënnerwee verschidde Schwieeregkeete missen iwwerwannen.

Grouss war d'Freed wéi d'Shof erëmfonnt ginn ass.



Mateneen ënnerwee



Wéi wichteg sinn dir d'Scouter?
Wat erliefs du, wat kriss du geschenkt?
Wat kanns du anere bréngen?













Du brauchst:
ee Rouleau Pakpabeier
eng Schéier
Pech
en décke Stëft
Faarwen
Zeeche mat der Hëllef vun engem aneren, d'Ëmrësser vun dengem Kierper op de Pakpabeier.
Wat erliefs du alles bäi de Scouten?
Schreif an deng Figur, pech Fotoen dobäi, mol Symboler oder Biller drop.
Tausch mat aneren deng Erfahrungen aus.

Dësen Text kann dir Ureegung ginn, du kanns en och ergänzen a weiderdenken....

*Jemand hat
mir zugelächelt
mir Mut gemacht
mir zugehört
mich um Rat gefragt
Zeit für mich gehabt
mir liebevoll auf die Schulter geklopft
sich von mir führen lassen
mir Vertrauen geschenkt
mir die Hand gereicht
mir Blumen gegeben
mir die Sterne gezeigt
mir übers Haar gestrichen
mich an sein Herz gedrückt
mich ernst genommen*

(Auteur unbekannt)






TEMPO Scouten!

E Scoutsgrupp ass ënnerwee op seng Campplaz. Et sinn all 5 Branchë mat hire Chef/tainen ënnerwee. D'Zelter si schonn a Siicht, elo maachen si ee Rennen fir ze kucken, wien am séiersten op der Campplaz ukënnt.

Spiller: 2 bis 6
Dir braucht: 6 Stëpp



Schrëtt 1

Kopéiert dëst Blat a schneit déi faarweg Kreesser an de Wierfel aus. De Wierfel musst dir zweemol kopéieren. Pecht d'Kreiser op d'Stëpp a faalt a pecht d'Wierfelen zesammen.

Schrëtt 2

Stellt all d'Spillfiguren op d'Spillefeld, och wa manner wéi 6 Leit matspillen. Passt op, datt d'Spillfiguren déi selwecht Faarf hunn wéi d'Startfelder.

Zil vum Spill ass et,

als éischten op der Campplaz unzekommen.


Ufank vum Spill

De jéngste Spiller fänkt un. Hie wierfelt mat deenen zwee Wierfelen a réckelt d'Spillfigure mat de selwechte Faarwen e Feld no vir: z.B. hei wierfelt blo a mof dann d'äerf hien d'Spillfigure mat blo a mof weider beweegen. Wann z.B. giel zweemol gewierfelt ginn ass, d'äerf déi giel Spillfigur zwee Felder no vir.

Dono kënn den nächste Spiller lénks un d'Rei asw.

Enn vum Spill

Wann eng Spillfigur beim Zelt ukënnt, huet dee Spiller, deen d'Figur beweegt huet, gewonnen.



Wuessdicher selwer maachen

Déi gréng Säit

Vill Liewensmëttel gi mat Frischhaltefolie bedeckt, dës flitt awer meeschtens nom 1. Gebrauch an d'Dreckskecht. Méi ökologesch sinn do Wuessdicher, déi genau esou gutt si fir lessensreschter ofzedecken! Si loosse sech einfach ënner kalem Waasser a mat alkoholfreiem Spüli propper maachen a kënnen bis zu engem Joer benotzt ginn.

Oppassen: De Wues huet zwar eng antibakteriell Wirkung, mee aus Hygiensgrënn soll een d'Dicher net fir réit Fleisch, Fësch oder Ananas notzen. D'Wuessdich ka sech all Form upassen, well et duerch d'Wiermt vun den Hänn geformt ka ginn.

Du kanns d'Wuessdicher ganz einfach selwer maachen. Esou kanns du d'Gréisst an d'Muster selwer bestëmmen a gläichzäitig Stoffreschter recycelen. Am beschten eegent sech Kotteng fir Wuessdicher ze maachen.

An esou geet et:

Fir unzefänken de Stoff op déi gewünschte Gréisst zouschneiden/zerrappen. (Oppassen: neie Stoff virdu wäschen, fir d'Beschichtung ewechzereien, soss kann de Wuess net richtig anzéien). Parallel de Wuess am Deckel schmëlzen. Dann de Stoff duerch de geschmolte Wuess zéie bis de Stoff sech vollgesaugt huet (d'Quantitéit riicht sech no der Gréisst an der Déckt vum Stoff). Am einfachsten ass et wann een zwou hëlze Klameren um Stoff festmécht fir en duerch de Wuess ze zéien, fir dass een sech d'Fangeren net verbrennt. Zousätzlech kann ee och nach e Bakpinsel benotzen.

Ofschléissend d'Wuessdich ofkille loosse. Wann de Wuess sech net reegelméisseg um Stoff verdeelt huet, kann een Bakpabeier op d'Duch leeën an eng Kéier driwwer strecken.

Vill Spaass beim Ausprobéieren!

Material:
Reschter aus Kotteng
Schéier
Deckel (z.B. vun engem Aludëppen)
Grill
Bakpinsel
Wuess
Feierhändschen
Klameren




Léiwe Wëllefchen

Elo gëtt et scho méi fréi däischer an et ass genau dee richtege Moment fir zesumme mat dengem Ruddel Spiller am Däischeren ze maachen.

An der Dunkelheet brauchst du ee gutt Gespier an du muss all deng Sënner benotzen. Et ass och flott zesumme mat dengem Ruddel an denge Chef eng Wanderung duerch de Bësch am Däischeren ze maachen, oder ee méi groust Spill mat vill Action ze probéieren. Op dëser Säit stelle mir dir e puer Iddie fir, mä denger Fantasie sinn och am Donkele keng Grenze gesat. Pass awer ëmmer gutt op dech op a géi néierens eleng hin wou s du dech net auskenns.

Wann s du am Däischeren iwwert oder laanscht eng Strooss goe muss, da pass heirobber op :

- probéier hell Kleeder unzedoen oder Kleeder mat Reflekteren (Blinkis)
- géi do iwwert Strooss, wou et gutt beliicht ass
- trëppel ëmmer géint d'Fuerrichtung vun den Autoen -> da kanns de besser vun den Autoschauffere gesi ginn
- trëppel (wa méiglech) ëmmer um Trottoir!



Wat glënnert a liicht do am Bësch?

Spill am Bësch

De Ruddel gëtt an dräi Equipe gedeelt, jidder Equipe kritt esou vill Liichtgéigestänn wéi Spiller an der Equipe sinn, dat sinn z.B. Knicklichter, kleng Spillsaachen déi liichten, fluoreszent Stären, Reflekteren, kleng Täscheluuchten, fluoreszent Hopsbäll...

All Equipe kritt ee grouse Beräich am Bësch zougewisen a leet selwer fest, wien a wéi enger Reiefolleg drükënt.

D'Liichtgéigestänn gi mat Ofstand vuneneen am Beräich verdeelt. Bei 'Lass' muss den éischten aus der Grupp den éischte Géigestand siche goen an dann och erëm zrëck hannert d'Startlinn bréngen. Wann et nach ze hell ass, oder den Objet ze einfach ze fannen ass, kann den deen deen sicht d'Aen mam Foulard verbonne kréien.

Déi aner aus der Equipe mussen hannert der Startlinn bleiwen, an dierfen hien nëmme mat hirer Stëmm leeden.

Gewonnen huet déi Equipe déi als éischt all hier Saachen zrëckbruecht huet. Dat musse si awer ganz däitlech matdeelen: d'Gewënnequipe séngt zesumme ganz haart ee Lidd gären och mat Bewegungen. D'Spill geet wieder bis déi lescht Equipe erëm komplett am Zil ass.

Spill dobaussen (Haff, Plaz) oder dobannen: Hëllef wou sinn ech?

Ee vun iech ass „de verierte Wëllefchen“ a kritt d'Aen verbonnen. „De verierte Wëllefchen“ muss elo am Däischeren néng Schrëtt maachen, an no dem 3. 7. an 9. Schrëtt ee Kräiz mat Kräid op de Buedem molen.

Nom 9. Schrëtt, soll de Wëllefchen dee selwechte Wee zrëckgoen, elo muss en awer probéiere ronderëm all Kräiz dat hien um Wee dohinner gemoolt huet, elo ee Krees molen.

Dee „verierte Wëllefchen“, den déi meeschte Kräizer ëmkreest huet, huet gewonnen.

Source: 100 Spiele im Dunkeln. Moses Verlag 2002
Naomi Walmsley, Dan Westall: Wald, dein größtes Abenteuer. Heel Verlag 2019



Naturläim selwer maachen

Vermesch den Zocker an d'Miel zu gläichen Deeler (z.B. 3 Löffelen Zocker an 3 Löffele Miel).

Dann no an no e bésse Waasser dobäi schédde a réieren. Wann s de déckfléssege Pap kriss, hues du e gudde Läim. Wann de Läim ze flésseg ass, da mach nees Zocker a Miel dobäi.

Du kanns de Läim 2-3 Méint am Frigo versueren.

Désen Naturläim kénnt der beispillsweis benotze fir Naturpinselen, Naturrummen oder aner Konschtwierker aus Naturmaterialien ze bastelen.

Du brauchst:



- Zocker
- Miel
- Waasser
- Löffel
- eidelt Glas mat Deckel (z.B. Gebeessglas)



Käerzen aus Beton

Du brauchst:

- Schnellzement
- 4 Teillichter
- 4 Becheren
- 4 Stärén aus Moosgummi (dési kanns du selwer rausschneiden)
- Pech



1. Schrëtt
Pech an all Becher ee Stär aus Moosgummi.

2. Schrëtt
Réier de Schnellzement mat Waasser op.

3. Schrëtt
Schëtt den Zement an d'Becheren. Stiech elo an all Becher een Teillicht. Du däärf net ze laang waarden, den Zement gëtt schnell haart.



4. Schrëtt
Huel de Beton aus dem Becher eraus. Wann et net gutt geet, dann huel eng Schéier a schneit de Becher futti.

5. Schrëtt
Wann s du wëlls, kanns du d'Stären nach mat Glitzer bemolen.

Vill Spaass beim Bastelen 😊



Waasser drénkbar maachen!

Dass Waasser iwwerliewenswichtig ass fir all Liewewiese weess jiddereen. Ëmsou méi erschreckend ass et ze gesi wéi wäertvoll et ass a Mëssbrauch domat bedriwwen gëtt wéi z.B. den Handel mam Drénkwaasser.

Eis Äerd besteet zu 30% aus Land a 70% aus Waasser. Dovu sinn awer nees 97,5 Salzwaasser an 2,5% Séisswaasser. An och déi lescht 2,50% si verdeelt op Gletscher, Äis an Uewerflächewaasser. Bleiwen also just nach 0,7% vum gesamt Waasservolumen déi drénkbar wieren. « Wieren », well d'Waasser ass a bal all de bewunnte Gebitter vun der Welt verschmottzt.

Wat maachen ech also elo wann ech um Camp sinn an Drénkwaasser brauch? Si mer um Camp Volant an de Bierger fanne mir ganz liicht Drénkwaasser bei frësche Quellen, déi direkt aus dem Bierg entsprangen. Deemno wou mir sinn, komme mir net dolaanscht eis d'Waasser ze filteren (hei gëtt et verschidde Methoden, déi mir jee nodeem wou mir sinn a wéi verschmottzt d'Waasser ass, uwenne kënnen).

Wat wëlle mir filteren?

- 1) Schwiefstoffer (Feststoff aus enger organescher Zesummesetzung wéi z.B. ofgestuerwe Planzematerial, Algen oder kléng Insekten)
- 2) Schwéiermetaller (wéi z.B. Quecksëlwer oder Bläi)
- 3) Mikroorganismen (Bakterien a Viren)

Um Kanu-Dag am September haten d'CaraPio e flotten Atelier wou se zesumme mat de Kandidaten zwee Waasserfiltere gebastelt hunn. Bei weidere Froen, zéckt also net d'CaraPio-Ekippe ze kontaktéieren !



1) Grobfilter

Dëse kënnen mir ganz einfach bauen an et ass och eng flott Iddi fir all d'Branchen.

D'Fläsch schneide mir hannen op a stellen se op d'Kopp. Als éischt stieche mir de Stoff an d'Öffnung, fir dass näischt méi erauslaffe kann. Dann kommen der Rei no folgend Schichten : Holzkuel, Sand, Kräsi, Steng. Fir dass d'Schichten sech net vermëschen, kanns de Blieder dotëscht leen. Mat de verschidde Schichten gëtt déi natierlech Versickerung vum Reewaasser am Buedem nogestallt.

An domat ass eise Filter och scho fäerdeg a mir kënnen d'Waasser duerch de Filter lafe loossen. Wat d'Waasser méi knaschteg ass, wat mir et méi oft duerch de Filter lafe loosse mussen. Am beschte kache mir et dono nach emol of.


2) Aner Methoden

Et gëtt nach vill méi Methoden d'Waasser ze filteren an drénkbar ze maachen. Praktesch fir ennerwee sinn Outdoor—Mikrofilteren déi een ze kafe kritt. Dës gëtt et an allen Präiskategorien an natierlech kënnen se méi oder manner. Och ganz praktesch fir ennerwee sinn déi sougenannte Chlortabletten. Dann bleift och nach ëmmer d'Optioun d'Waasser ofzekachen.

Zesummegefaasst : Et gëtt verschidde Methode fir d'Waasser drénkbar ze maachen, déi jee nodeem wéi verschmottzt d'Waasser ass ugewannt ginn. Natierlech ass och ëmmer eng Kombinatioun vun deene verschidde Methode méiglech.

Wat mir brauchen :

- eng Plastikfläsch
- Stofffatzen
- Holzkuel
- Sand
- Kräsi a Steng
- Propper Blieder



CaraPio Summercamp

Am Juli 2020 ass et no 7 laange Jore Paus, an awer erënnere mir eis un de UK'an 2013, wéi wann et gëschter gewiescht wier endlech nees esouwäit an eng 350 CaraPio a Chef fueren op hiren nationale Summercamp zu Bovec a Slowenien a mir hoffen, dass och DU dobäi bass.

Alleguer d'Infoen iwwer de Camp fënns du um Site vun de CaraPio ënnert:

carapio.lgs.lu

Um Programm steet vill Action mee och dat kulturellt an « Typesch Scout » wäert net ze kuerz kommen.

WANTED:

Du bass kee CaraPio méi a fiers och net als Chef mat op de Camp, mee wëlls dir dat eemolegt Erlefnis net entgoe loossen? Ma da wär dat hei villäicht eppes fir dech: Mir sichen nach dringend Verstärkung am Ravi-Staff!

Zéck net a kontaktéier eis séier ënnert:

slovit@lgs.lu



Wat ass en Odyssee Projet?

D'RaRo kënnen un engem internationale Camp-Chantier Deel huelen an der Summer-vakanz 2020. Bei dësem Camp geet et drëm eng friem Kultur mat Jonke vun der Plaz ze entdecken a kennen ze léieren. De Chantier an de kulturellen Austausch stinn dobäi am Méttelpunkt. D'Campliwien a verschiddene Visitte sinn och en Deel vum Projet.

D'Virbereedung vun engem Odyssee Projet fänkt mat der Aschreiwung um Weekend de Lancement un an dauert bis d'Odyssee Night Enn des Joers 2020. D'Preparatiouns-weekender an déi national Finanzaktioun (de Charity Wanter Hike) si fir all Participant obligatoresch. Duerch vill Finanzaktiounen an Done gëtt de Chantier sur Place finanziert. Den Openthalt am Land bezilt all Participant selwer.



Odyssee Projet Senegal

Projet « Diapal Ma Diap » (Mets ta main, je mets la mienne)

D'Branche RoRo vun de Lëtzebuerger Guiden a Scouten organiséiert an Zesummenaarbecht mat AJAT (Association des Jeunes Apprentis à Thiès) am August 2020 e Camp-Chantier zu Thiès am Westen vum Senegal, net wäit ewech vun Dakar.

Beim Camp-Chantier „Diapal Ma Diap“ geet et drëms, wéi de Numm et scho seet, zesummen eng Hand mat unzepake fir déi senegalesesch Realitéit e Stéck wäit ze verbesseren. Zesumme mat eise senegalesesche Frënn renovéiere mir eng Primärschoul déi, säit se an den 1930er opgebaut ginn ass, net méi an d'Rei gesat ginn ass. Déi vill an dréngend Renovatiounsarbechte ginn während 2 Wochen an Zesummenaarbecht tëscht jonke Lëtzebuerger RaRo an deene jonke Membere vun AJAT realiséiert. Sou versiche mir eisen Deel dozou bäizetroen, dass d'Kanner aus der Schoul d'Méiglechkeet kréien an engem anstännegen Ëmfeld ze léieren an sou hier Chancen zu enger besserer Educatioun ze erhéijen.

Mee net nëmmen de Chantier ass wichteg beim Camp „Diapal Ma Diap“. Och d'Zesummeliewen, de kulturellen Austausch a vuneneen a mateneen léieren, spillen eng grouss Roll. Dofir si während dem Camp och eng sëllege Aktivitéit virgesinn, wou sech déi zwou Kulture besser kenneléieren an sech méi no kommen. Nëmme zesumme kënnen mer eppes errechen.

Eise Partner AJAT:

D' « Association des Jeunes Apprentis à Thiès », kuerz AJAT, ass eng Grupp vu jonken a manner jonke Léierbouwen a -meedercher, déi sech zesumme geden hunn, fir eng méi grouss Stëmm ze hunn fir hier Rechter anzefuerderen. Am Senegal besteet de systematesche Problem, dass Léierbouwen a -meedercher ganz spéit hier Meeschterkaart kréien, well déi vun hire Patronen ausgestallt gëtt an déi léiwere Apprentis'en bezuele wéi fäerdeg ausgebildeten Aarbechter, well Apprentis'en ganz einfach méi bëlleg sinn. Dorausser entsteet eng prekär an onsécher Situatioun fir d'Léierjongen a -meedercher. D'AJAT setzt sech also dofir an, dass dëse Problem ugepak gëtt a sicht no konkrete Léisungen. Duerch d'Vernetze vun den eenzelen Apprentis'en, duerch d'Opkläre vum Problem an duerch eng gutt Organisatioun probéiert d'AJAT deene jonken Aarbechter zu enger besserer a méi sécherer Zukunft ze verhëllefen.



Odyssee Projet Georgien

Am August 2020 wäerte mir am Kader vun der Odyssee 2020 ee gemeinsame Camp mat de Scoute vu Rustavi organiséieren.

Op 720 m iwwert dem Mieresspiegel, am grouse Kaukasus, wäerte 40 lëtzebuerger RaRo a 40 georgesch RaRo zesummen eng nei Campplaz amenagéieren, fir dass eis georgesch Partner do an Zukunft kënnen Campen a Formatiounen duerchféieren.

D'Scouter a Georgien si fir vill Kanner eng vun de weinege Méiglechkeete fir hir Fräizäit méi interessant ze gestalten, an d'Campplaz déi matten an der Natur läit ass ideal fir de Kanner aus der Staat een ofwiesslungsräichen a spannende Camp ze bidden. Haaptzil vun dësem Camp ass de kulturellen Austausch sou wéi d'Weiderbildung vu Scoutsmethoden vun de lëtzebuerger an de georgesche Participanten.

A gemischte Patroulle vun 8-10 Jonker wäerten d'Participanten zesumme souwuel Aarbechten op der Campplaz duerchféieren, wéi och een ofwiesslungsräiche Programm, mat klengen Formatiounsmoduler an Debaten iwwert Scoutsmethoden, plangen an duerchféieren. Déi Jonk wäerte schonns am Wanter ufänke mat de Georgier zesummen de Programm auszuschaffen.



Odyssee Projet Bolivien

Bolivien ass ee Land, dat op der enger Säit duerch déi 30 verschidden indigen Volleksgruppen aus deenen et besteet zwar räich un Traditionen, Dänz a Kultur ass, mee gläichzäiteg zu deenen ärmste Länner op der Welt gehéiert. Sou leide 27% vun de Bolivianer dauerhaft Honger a Kanner iwwerliewen u sech ganz harmlos Krankheeten oft net. Ëmmerhin huet ee Schoulbonus vun 20 € op de Kapp dozou gefouert, dass haut ronn 98% vun de schoulpflichtige Kanner an d'Schoul ginn, och wann d'Schoulbedingungen nach ëmmer relativ schlecht sinn.

Mat dësen Hannergedanken am Kapp reise mir 2020 a Bolivien fir op där enger Säit op engem Campchantier d'Liewens- an d'Léierbedingunge vun de Studenten aus der Berufsschoul zu Bella Vista, respektiv de Schüler aus der öffentlecher Schoul zu Chokaya ze verbesseren. Op där anerer Säit wëlle mir nieft dësem Chantier awer virun allem och d'Land a seng Leit kenne léieren an sou de kulturellen Austausch tëschent de bolivianeschen an de lëtzebuergesche Particiante fuerderen.

Fir eise Projet kënnen ze realiséieren, schaffe mir zesumme mat der "Fundacion Cristo Vive" vun der Schwëster Karoline a mat der ONGD Lëtzebuerger Guiden a Scoute fir eng Welt.



Charity Wanter Hike



De Charity Wanter Hike ass eng Aktivitéit, déi an d'Liewe geruff gouf fir d'Odyssee'en, déi am Summer 2020 stattfannen, z'ënnerstëtzen. Haaptzil vun dëser Aktivitéit ass et, Donen ze sammelen, déi benotzt ginn, fir d'Camp-Chantieren ze finanzéieren.

Stéichdatum ass den 08. Februar 2020, vun 10h00 moies bis 22h00 owes. Während där Zäit kënnst dir dohi kommen a mat ärem ganze Grupp en flotten Dag verbréngen.

D'Aktivitéit fënnt zu Miersch statt, mam Depart beim Mierscher Scoutschalet. Beim Chalet gëtt et och Verfleegung (Grill, Buvette, Kaffi, Kuch). Mir hunn eis fir Miersch entscheet, well et gutt mam ëffentlechen Transport erreechbar ass.

Wéi den Numm et scho seet, ass de Charity Wanter Hike eng Wanderaktivitéit. Bewäert ginn hei déi getrëppelt Kilometer. Iwwert en oppene Parkour trëppelen d'Participante vu Posten zu Posten a loossen sech do hier getrëppelt Kilometer validéieren. Wéi laang a wéi vill een trëppelt ass jidderengem selwer iwwerlooss. Nom trëppele kann een sech am Chalet an enger gemittlecher Ambiance mat sengem Grupp a mat aneren austauschen an d'Aktivitéit ausklänge loossen.

Fir eis jonk Branchen hu mer och Spiller an Ateliere preparéiert, ob déi si mat Kilometer Punkte bewäert ginn. Duerch d'Sammele vun dëse Punkte kënnen och si sech um Odyssee-Projet bedeelegen.

Sou kann ee mat sengem ganze Grupp dohi kommen, et ass vir jiddereen eppes dobäi.

D'Umeldunge geschéien iwwert raro@lgs.lu. Mir setzen eis da mat iech a Verbindung fir ze kucken wéini dir komme wëllt. Dir kënnst et als Sortie mat ärem Grupp organiséieren a just e puer Stonne kommen oder dir kommt méi laang. Dat ass iech komplett fräi iwwerlooss.

Weider Informatiounen fannt der um LGS-RaRo Internetsite.

Mir freeën eis op äre Besuch,

Är RaRo- an Odyssee- Equipe



News ONGD



D'ONGD wëll nach eemol Reklamm maache fir hire SPILLCLASSEUR an aner flott Aktivitéiten an Iddien zu verschiddenen Themen vun der ONGD.

Dës Aktivitéite kënnst dir an är Versammlungen, Weekender oder Campe mat abauen a mir an der ONGD sinn disponibel dës zesumme mat iech virzubereeden an och duerchzuféieren.

Wann dir méi heiriwwer wëllt gewuer ginn, da mellet iech bei ons an der ONGD.

Tel. 26 94 84 24 / 26 94 84 23

elisabeth.voyeux@ongd-lgs.lu / anne.botzem@ongd-lgs.lu

oder kommt laanscht an der Géisserei.



Volontaire am Senegal fir 6 Méint

Moien, mir sinn d'Lis (Binetou Diouf) an d'Joyce (Fatou).

Mir ware sechs Méint am Senegal zu Mboro am CREPE, engem Zenter dee sech dofir asetzt, dass all Kand eng schoulesch Bildung kritt, egal aus wéi enge soziale Verhältnissen si kommen oder ob si ee physischen/mentalen Handicap hunn.

Mir hunn dohanne geléiert mat manner auszekommen, a schnell gemierkt, dass ee fir ze liewe guer net esou vill braucht, ewéi een dat ëmmer mengt.

Mir hunn och geléiert méi Gedold ze hunn a manner gestresst ze sinn, mir hu vill manner op d'Auer gekuckt a Verspéidung hunn, war ni ee grousst Thema.

Mir kënnen soen, dass déi 6 Méint definitiv derwäert waren an mir vill geléiert hunn, ob elo duerch d'Aarbecht mat de Kanner oder generell iwwert d'Liewen a Westafrika, Saachen déi keng Schoul engem bäibréngt. Dofir si mir onse Frënn aus dem Senegal immens dankbar.

Wann dir elo Loscht hutt och esou e Volontariat ze maachen oder Froen dozou hutt, da mellet iech bei ons an der ONGD .



9. Internationalen Keltensfestival Beltaine

Neihaischen / Schëtter



30 & 31 Mee 2020



Während den zwee Deeg

Keltescht Liewen an Handwierk,
Live Musek, Showkämpf
Feiershow, Verkafsstänn

Iwwer 30 Atelieren
a Spiller fir Kanner
keltesch Spiller fir Erwuessener



Wanted Wanted

Mataarbechter gesicht fir de Bealtaine Festival 2020

Den 30. - 31 Mee organiséieren d'Lëtzebuurger Guiden a Scouten nom grouse Succès vun de leschte Joren déi 9. Editioun vum Keltensfestival Bealtaine.

De grouse Succès vum Festival verdanke mir natierlech de ville Mataarbechter, déi eis de Weekend gehollef hunn. Och dëst Joer brauche mir erëm vill Hänn.

Hues du also Loscht an Zäit eis dëse Weekend ze hëllef, da mell dech esou séier wéi méiglech.

Wat bidde mir?

Gratis Entrée fir de Festival; vill Aarbecht awer och vill Spaass; exklusiv Méiglechkeet Samschdes owes a besonnesch Sonndes owes mat eis ze feieren; Ennerstëtzung vum Projet „Native Village“.

Wou brauche mir elo nach dringend Hëllef?

Chargen, wou nach vill Leit gebraucht ginn:
Mathëllef bei der Animatioun vun de Workshoppe fir Kanner; Entréeskeesen (Schichte vu 4 Stonnen); Fräiwëlleger bei der Tarte Flambée (Pizzauewen); Leit an der Spull; Fräiwëlleger beim Opriichten / Ofrappen

Chargen, wou nach eenzel Leit gebraucht ginn:

Bongekees; Grill

Wéi kënnt dir iech elo mellen?

Dir kënnt eis eng Mail schécken op: news.nativevillage@pt.lu

E grouse Merci fir är Ennerstëtzung!

Lampions Concours Bealtaine



Wien?

all Branchen

Baut e Lampion mat ärer Branche fir de Bealtaine Festival 2020.

Wat?

Esou kënne mir de Bësch an d'keltesch Infrastrukturen och owes fantasievoll a kreativ belichten.

Concours:

Mir wëllen e Concours lancéieren, wou samschdes owes, déi flottste Lampionne vun engem Jury ausgewielt ginn.

Präisser:

1. ee komplett organiséierte Weekend mat Programm an lessen am Keltenshaus
2. + 3. LGS-Corbeille

Umeldung:

neihaischen@lgs.lu bis Enn Januar



Der a.s.b.l. hir Säit

Vun dësem Platte Knuet un, wëll d' a.s.b.l. vun de Lëtzebuenger Guiden a Scouten, déi dem Verband nosteet, sech selwer an hir sëllegen Aktivitéite presentéieren an dëst all kéiers mat engem flotte Concours verbannen, bei deem et schéi Präisser ze gewanne ginn.

Wat mécht d'Lëtzebuenger Guiden a Scouten a.s.b.l.?

Zil vun der Lëtzebuenger Guiden a Scouten a.s.b.l. ass et de Verband a verschiddene Beräicher z'ënnerstëtzen. Esou ënnerhält si déi zwee national Formatiouns- an Animatiounszentren Neihaischen a Bilschdref, geréiert den LGS-Shop a këmmert sech ëm d'Campplaz am Fënsterdall.

Wien ass d'Lëtzebuenger Guiden a Scouten a.s.b.l.?


D'Lëtzebuenger Guiden a Scouten a.s.b.l. ass ee Grupp vu ronn 40 benevole Guiden a Scouten. Zäitweis ginn se vu ville weidere Mataarbechter ënnerstëtzt. Dës vill Hänn sinn néideg, dass d' a.s.b.l. hire sëllegen Aufgaben nokomme kann.



D'Récksäit vum Nationale Formatiouns- an Animatiounszenter „Chalet Nicolas Rollinger“ um Neihaischen während de Vergréisserungsarbechten



Den Nationale Formatiouns- an Animatiounszenter „Relais de l'Amitié“ zu Bilschdref



Den LGS-Shop an der Maison Lesure op Nummer 1 an der Origerstrooss op der Stater Gare



D'Scoutskapell „Notre-Dame des Bois“

De Concours

Präisser:

1. Präis: ee grouse Rucksak
2. Präis: ee Bong vu 50 € fir den LGS-Shop
3. Präis: ee Bong vu 25 € fir den LGS-Shop

Quizfro: A wéi engem Joer gouf d'Scoutskapell „Notre-Dame des Bois“ um Neihaischen ageweit?

Mail deng Äntwert w.e.g. virum 31. Januar 2020 op concours.asbl@lgs.lu a schreif däi ganzen Numm, deng Branche an däi Grupp dobäi.

Reglement vum Concours:

Matmaache ka jiddereen, dee Member vun de Lëtzebuenger Guiden a Scouten ass. ; - Jiddereen kann nëmmen ee Mol pro Platte Knuet matmaachen. ; - D'Äntwert(en) sinn op d'E-Mail-Adress concours.asbl@lgs.lu ze schécken. ; - Nom Delai gi keng Äntwerte méi ugeholl. Als Datum an Auerzäit vun der Äntwert zielen déi, déi op der E-Mail stinn. ; - D' Gewënner ginn am Conseil d'Administration vun der Lëtzebuenger Guiden a Scouten a.s.b.l. ermëttelt. Dëst ass dann definitiv. ; - D'Nimm vun de Gewënner ginn am nächste Platte Knuet publizéiert. ; - Duerch d'Deelhuelen um Concours gëtt dëst Reglement unerkannt.

News Verband

Neijoerschpatt, Freideg den 10. Januar

vu 17 Auer un LGS-Afterwork bei der Géisserei

Gegrills, Chilli, Zopp, Glühwäin a Co., Musek, Frënn, ... alles, wat d'Guiden a Scoute brauche fir gutt an dat neit Joer ze starten.

Den offiziellen Deel fänkt ëm 19 Auer an der Géisserei un.

umeldung@lgs.lu



Eng Studiërees op Mauthausen



2020 ass de 75. Anniversaire vum Enn vum 2. Weltkrich a vun der Liberatioun vum KZ Mauthausen (Eisträich).

Aus dësem Grund organiséiert d'Lëtzebuenger Amicale vu Mauthausen zesumme mat de Lëtzebuenger Guiden a Scoute vum 06. bis den 11. Mee 2020 eng Rees fir CaraPio, RaRo a jonk Cheffen op Mauthausen. Nieft der Gedenkstätte Mauthausen, wäerte mir och aner Gedenk- a Lernorte, wéi d'Gedenkstätte Gusen an Ebensee besichen. Zudeem steet eng Visitt vu Salzburg um Programm.

Och bei den internationale Feierlechkeete fir de 75. Anniversaire vun der Liberatioun vum KZ Mauthausen, den 10. Mee 2020, si mir mat dobäi.

Et ass eng eemoleg Geleeënheet, aner Jugendlecher aus Ost- a Westeuropa ze begéinen a méi iwwert eis Geschicht kennen-zeléieren. Zudeem ass en Treff an neie President vum Europaparlament, dem David Sassoli, geplangt.

En Deel vun der Reeskäschte ka vun der Fondation Nationale de la Résistance iwwerholl ginn. Wann no der Rees eng pädagogesch Aktivitéit ausgeschafft gëtt, ass et och méiglech e Subside unzefroen.



Weider Informatiounen kritt dir an der nächster Newsletter.

Hei nach e puer Detailer:

Alter vun de Participanten: 16 bis 25 Joer

Infoen an Umeldung: marlen.oldenburg@lgs.lu

Umeldeschluss: 15.02.2020

Scout toujours, même sur ta carte bancaire !



Dès à présent, commande ta carte bancaire BIL gratuite et personnalisée aux couleurs du LGS sur www.bil.com ou en agence.

Retrouve-nous sur   



Cette offre est soumise à conditions.
Renseignements sur www.bil.com ou en agence.

Vous avant tout



Pädagogesche Koffer "Exit Game"

Sidd dir bereet fir en Escape Game dobaussen? A klengen Ekippen vun 3-6 Persoune muss dir zesumme Rätselen an Aufgabe léise fir iech ze befreien. An dat alles a maximal 2 Stonnen. Egal ob matten am Bësch oder ganz no bei iech beim Home – d'Escape Game kann bal iwwerall stattfannen. Vill Plaz braucht dir och net. Et gëtt zwee verschidden Escape Games. Pro Spill si Materialie fir max. 4 Ekippen mat dobäi. Nieft enger detaillierter Spillerklärung fannt dir bal all Materialien am Koffer.

Gefangen im Tausend-Morgen-Wald - Eine schatzsuche Escape Game fir Biber a Wëllef

Während dir als Visiteure vum Hundert-Morgen-Wald e flotten Dag mat Elfen, Zwergen & Co. erlebt, gëtt d'Schatzkëscht vum Zwergkinnek geklaut. De Kinnek ass esou rosen doriwwer, dass de ganze Bësch mat engem Bann beluecht gëtt. Dat heescht, dir kënn de Bësch eréischt verloossen, wann d'Schatzkëscht erëmfonnt ginn ass. Dofir gëtt är Hëllef gebraucht. Sidd dir bereet fir d'Aventure?

Gefahr in den Tropen Escape Game fir AvEx, CaraPio a RaRo

Dir sidd als Journalisten am Reebësch a Brasilien ënnerwee fir ze beweisen, wéi d'global Grousskonzerner Klengbaueren ausbeuten. Leider hunn si all är Recherche matkritt. Fir sech ze rächen hunn si nieft ärer Ausrüstung och d'Landkaart geklaut. Packt dir et, d'Kaart zréck ze kréien an de Reebësch ze verloossen?

*Reservéiere kënn dir de Koffer an der Chefbox:
chefbox/reservatioun-pad-kofferen*



Mérite Jeunesse



D'Fondatioun Mérite Jeunesse Luxembourg gehéiert zur weltwäit féierender Organisatioun The Duke of Edinburgh's International Award, déi an iwwer 140 Länner aktiv ass. Jidderee ka beim Mérite Jeunesse matmaachen, wann en tëschent 14-24 Joer al ass a Loscht huet sech innerhalb vun engem flexibelen an ofwiesslungsräichen Programm seng perséinlechen Zieler ze setzen an déi ouni Zäitlimit ze errechen.

Du muss a 4 verschiddene Beräicher aktiv ginn: Benevolat, Sport, Talent an eng Expeditioun maachen. Du sichts dir deng Aktivitéite selwer eraus a stells dir esou ee Programm zesummen deen ausgeglach ass an deen dir Spaass mécht. Et muss een net alles zur gläicher Zäit maachen. Dee Programm soll et dir erméiglechen méi Selbstvertrauen ze kréien, Responsabilitéit ze iwwerhuelen, Neies ze entdecken an un deng Fäegkeeten an Talenter ze gleewen.

Als Member vun den LGS kanns du ënnert anerem däi Chefengagement als Benevolat urrechne loossen an deng Formatioun vum 1. Zyklus als Talent. Da feelt der schonn net méi vill fir de Bronze Niveau ze errechen. Bass du tëscht 14 a 24 Joer, a wëlls de Mérite bei den LGS maachen? Da mell dech bei merite@lgs.lu. Weider Infoen fënns de och op merite.lgs.lu oder merite.jeunesse.lu.



Memberskaart Abo Platte Knuet



Léif Memberen,
an Zukunft verschécke mir d'Memberskaart net méi iwwert de Platte Knuet.
Eüst v.a. well ëmmer méi Leit nëmmen nach 1 Platte Knuet pro Stot gefrot hunn oder wëllen op déi digital Versioun zeréckgräifen.
Dofir ginn d'Memberskaarten all zesummen am Januar iwwert äre Gruppechef verdeelt.
Falls och dir nëmmen nach ee Platte Knuet pro Stot wëllt oder guer kee méi, mellet iech w.e.g. bei ärem Gruppechef fir dass deen dat am Fichier ännere kann.
Den Platteknuet fannt dir online an der chefbox/publi

News Statutenekipp

Mer hunn un der Propose zu dem Kapitel "Grupp, Memberen, Chef, Formatioun" geschafft an denken dass mer eis Propose fir Ufank 2020 kenne publizéieren.

Fir Enn Mäerz 2020 kucke mer d'Kapitel "Pädagogesch Ziler Prinzipien Wäerter" ze publizéieren.

Mer wäerte fir de Summer 2020 eng definitiv Gesamtproposé de Cheftainen a Chef virstellen

Eisen Zäitplang geet leider e ganzt sech em 1 Joer geréckelt.

All Infoen an eis Proposen u der Statutenännerung fannt der op statuten.lgs.lu



Impressum

LGS Zeitung- N°1, 2019/2020
Zäitschrëft vun de Lëtzebuurger Guiden a Scouten, kënn 3 mol am Joer eraus.
Redaktioun a Mataarbechter vun dëser Nummer : Zeitungsekipp, Branchenekippen, d'Team, Verbandssekretariat&Safab, PR-Ekipp, lokal Gruppen
Fotografie : LGS, lokal Gruppen, PR-Ekipp, Verbandsgrupp, Nadia Blasen, Philippe Dauphin, Jules Foxius, Jérôme Klein, Gilles Martin, Claude Pirsch, Réne Wersand, Sascha Wolsfeld
Editeur :
Lëtzebuurger Guiden a Scouten
5, rue Munchen-Tesch
L-2173 Luxembourg
www.lgs.lu
Kontakt : platteknuet@lgs.lu
Bei Adressännerung w.e.g. de lokale Grupp kontaktéieren!
Dréckerei : Print Solutions
Gedrëckt op 100% recycléierte Pabeier
Oplo : 4700 Stéck

E grouse Merci, deenen, déi zu dësem Platte Knuet bäigedroen hunn !

Save the date!

21 2019 DEZ	Friddensliicht zu lechternach	10 2020 JAN	Neijoerschpatt Géisserei	11 2020 JAN	LGS/SNJ Nuetsfunkraid Ierpeldeng
11 2020 JAN	Funkraid Neihaischen	18 2020 JAN	1. PS Weekend	18 2020 JAN	Admin. Dag Géisserei
24 2020 JAN	Wëllefchers-STIP Neihaischen	08 2020 FEB	Wanter Charity Hike Miersch	08 2020 FEB	2. PS Weekend
22 2020 FEB	World Thinking Day	07 2020 MAR	Spiri Weekend zu Orval	21 2020 MAR	GC Formatioun Neihaischen
27 2020 MAR	Zero Waste fir GaraPio Neihaischen	27 2020 MAR	Kick-Off Bealtaine Neihaischen		

Exp.: Lëtzebuurger Guiden a Scouten

Luxembourg
Port payé
P/S.400

www.lgs.lu